



Minggu, 28 April 2024
Ogen: Lukas 1:39-45



Erkade-kade Ras Elisabet



Mekade-kade jadi sada pengajaren orangtua man anak-anakna. Si enda teridah arah nggitna orangtua si ndube mabai anak-anak ndahi kade-kade subuk i bas kerja-kerja bage pe kerja tahun. I je me ituriken kerna perkade-kaden e. Kade-kade e me keluarga si ndeher ras kita. Inganta erbagi kekelengen bage pe ndatken kekelengen. Kade-kade erbahanca sangkep geluhta.

Maria erkade-kade ras Elisabet. Tupung ialokenna sada dahin si mbelin bas Dibata nari erkelangken malaikat Gabriel, ipetetapana ukurna. Minter dahina kade-kadena si Elisabet, bagi siikataken malaikat e. Meriah ukurna i bas ndalanken si e. Seh kenca i bas rumah kade-kadena e ikatakenna mejuah-juah. Ertina kerehenna e maba kinijuah-juahen. Elisabet tupung megiranan Maria e minter ergiah-giah ukurna. Tergejap pe nandangi anak si lit i bas bertinna e ermeriah ukur. Perjumpaan enda maba keriahen ras kemalemn ate. Ipujiken Elisabet me si Maria, ikatakenna ia me diberu si sangap ndatken pasu-pasu si mbelin erkiteken ia me nande Tuhan. Igejapken Elisabet maka ia pe sangap kal erkiteken kerehen Maria ku bas jabuna. Bage me adi si kadekaden, sada kesangapen si akap jumpa ras sidahi-dahin. Kerehen kade-kade nambahi kemalemn ate kap.

Arah pengalamen Maria ras Elisabet enda teridah maka; Maria bas kerina kecibal geluhna nggit ia ndahi kade-kadena. Kade-kade e jadi ingan erbagi, ingan nuri-nuri. Ndatken gegeh si mbaru tupung paksa kote. Genduari uga dage kecibal kade-kadeta entah sangkep geluhta. Sidahi-dahin denga nge kita? sisungkunen denga kerna kecibal geluh? Entah kade-kade pe terjeng kerja-kerja saja? Adi Maria ncidahkan kepatuhenna man Dibata arah ndahi kade-kadena dengen ncidahkan kekelengen kempaksa, oratna kita pe mpebelin biak si bage rupana i bas perkade-kadenta.

✎ *“Kade-kade ingan ergani-gani kap”*



